

Na osnovu čl. 12. tač. b), g) i l) i 18. tačka b) Ustava Kantona Sarajevo („Službene novine Kantona Sarajevo“ br. 1/96, 2/96, 3/96,16/97, 14/00, 4/01, 28/04, 6/13 i 31/17), Skupština Kantona Sarajevo na sjednici održanoj _____ 2024. godine, donijela je

NACRT

ZAKON O DUALNOM OBRAZOVANJU

DIO PRVI – OSNOVNE ODREDBE

Član 1.

(Predmet zakona)

- (1) Ovim zakonom uređuju se sadržaj i način ostvarivanja dualnog obrazovanja, uzajamna prava i obaveze učesnika u dualnom obrazovanju, finansijsko obezbjeđenje učenika, ugovori u dualnom obrazovanju kao i druga pitanja od značaja za dualno obrazovanje.
- (2) Odredbe ovog zakona primjenjuju se na srednje stručno obrazovanje i obuku u trajanju od tri, odnosno četiri godine.
- (3) Na sva pitanja vezana za dualno obrazovanje koja nisu regulisana ovim zakonom primjenjuju se odredbe važećih propisa iz oblasti srednjeg obrazovanja.

Član 2.

(Upotreba ženskog ili muškog roda)

Terminološko korištenje ženskog ili muškog roda u ovom zakonu podrazumijeva uključivanje oba roda.

Član 3.

(Značenje pojmova)

Pojedini pojmovi u smislu ovog zakona imaju sljedeća značenja:

- a) „ishodi učenja“ predstavljaju pisane definicije kompetencija, vještina i/ili stavova koje bi učenik trebao da stekne tokom određenog perioda učenja kroz rad;
- b) „stručne kompetencije“ predstavljaju sposobnost upotrebe stečenih znanja, vještina i stavova, neophodnih za obavljanje radnih aktivnosti, formalno priznatih na osnovu standarda zanimanja;
- c) „standard zanimanja“ predstavlja spisak svih poslova koje pojedinac obavlja u određenom zanimanju i popis kompetencija potrebnih za njihovo uspješno obavljanje;
- d) „dualno obrazovanje“ je model realizacije nastave u sistemu srednjeg stručnog obrazovanja u kojem učenici kroz teorijsku nastavu i vježbe u školi i učenje kroz rad kod poslovnog subjekta, stiču, usavršavaju, odnosno izgrađuju znanja, vještine, sposobnosti i stavove u skladu sa standardom zanimanja i nastavnim planom i programom;
- e) „poslovni subjekat“ je privredno društvo, ustanova, lice koje samostalno obavlja djelatnost ili obrtnik koji ispunjava propisane uslove za organizaciju i izvođenje učenja kroz rad učenika i posjeduje odgovarajuću potvrdu o ispunjenosti uslova za izvođenje učenja kroz rad. Poslovni subjekat se ne smatra poslodavcem niti licem za kojeg učenik obavlja bilo koji oblik rada predviđen propisima koji regulišu oblast radnih odnosa;
- f) „konzorcij“ je zajednica poslovnih subjekata koji obavljaju istu ili sličnu djelatnost osnovana na temelju partnerskog ugovora s ciljem sudjelovanja u zajedničkim aktivnostima radi omogućavanja izvođenja kompletnog praktičnog nastavnog programskog sadržaja za određeni obrazovni profil;

- g) „učenje kroz rad“ je oblik nastave koji se izvodi kod poslovnog subjekta koji ispunjava uslove za izvođenje učenja kroz rad predviđene ovim zakonom pod nadzorom mentora i koordinatora;
- h) „mentor“ je lice koje je zaposleno kod poslovnog subjekta ili lice koje samostalno obavlja djelatnost, upisano u registar mentora, odgovorno za organizaciju, vođenje i praćenje učenja kroz rad kod poslovnog subjekta u skladu sa planom realizacije učenja kroz rad kod poslovnog subjekta;
- i) „koordinator učenja kroz rad“ (u daljem tekstu: koordinator) je lice koje je u radnom odnosu u školi i koje koordinira učenje kroz rad koje se izvodi kod poslovnih subjekata;
- j) „plan realizacije učenja kroz rad kod poslovnog subjekta“ (u daljem tekstu: plan realizacije učenja kroz rad) je pisani dokument koji se izrađuje i donosi u saradnji škole i poslovnog subjekta ili konzorcija kojim se utvrđuje sadržajni i vremenski raspored izvođenja učenja kroz rad kod poslovnog subjekta;
- k) „škola za srednje stručno obrazovanje i obuku“ (u daljem tekstu: škola) je srednja tehnička škola, srednja stručna škola i druge vrste srednjih škola koje pružaju srednje stručno obrazovanje i obuku u skladu sa propisima koji uređuje oblast srednjeg stručnog obrazovanja i obuke i
- l) „karijerni razvoj učenika“ (u daljnjem tekstu: karijerni razvoj) predstavlja osnaživanje pojedinca kako bi postao najbolji u poslu kojeg će obavljati. To se postiže identifikacijom svih pravaca profesionalnog i karijernog razvoja, odabirom adekvatnog obrazovanja i mehanizama podrške do zaposlenja.

DIO DRUGI – OPĆI PRINCIPI I CILJEVI

Član 4.

(Principi dualnog obrazovanja)

Dualno obrazovanje zasniva se na obavezi svih učesnika da se rukovode najboljim interesom učenika, u skladu sa sljedećim principima:

- a) partnerstvo škole i poslovnog subjekta - saradnja i jasna podjela obaveza i odgovornosti u obezbjeđivanju kvalitetnog procesa učenja kroz rad;
- b) uspostavljanje socijalnog partnerstva na lokalnom nivou - uključenost svih zainteresovanih strana u proces planiranja, realizacije i praćenja efekata dualnog obrazovanja kroz utvrđeni institucionalni okvir;
- c) profesionalnost - uspostavljanje formalno-pravnog odnosa između učenika, poslovnih subjekata i škole u procesu obrazovanja;
- d) etičnost - poštovanje ličnosti i dostojanstva učenika i ostvarivanje ciljeva obrazovanja;
- e) uvažavanje - poštovanje poslovnog subjekta i njegovog kodeksa ponašanja;
- f) osiguranje kvaliteta - koordinacija i uspostavljanje standarda na svim nivoima i praćenje efikasnosti dualnog obrazovanja;
- g) karijerno vođenje i mogućnost zaposlenja - razvoj vještina upravljanja karijerom i obezbjeđivanje većih šansi za zapošljavanje;
- h) dostupnost - jednaki uslovi za sve za kvalitetan pristup dualnom obrazovanju;
- i) relevantnost - usklađenost s potrebama poslovnih subjekata i tržišta rada;
- j) prohodnost - pristup različitim područjima rada u okviru istog nivoa obrazovanja i ka višim nivoima obrazovanja;
- k) cjeloživotno učenje - omogućavanje obrazovanja i razvoja tokom cijelog života u svim oblastima života i rada;
- l) pravo izbora - sloboda izbora zanimanja i obrazovnog profila u okviru utvrđenih kriterijuma i

- m) jednake mogućnosti - obezbjeđivanje jednakih uslova za sticanje obrazovanja, bez ikakve diskriminacije s obzirom na pol, rasnu, nacionalnu, kulturnu, etničku i vjersku pripadnost, jezik, mjesto boravka, materijalno stanje, invaliditet i druga lična svojstva.

Član 5.

(Princip jednakog pristupa dualnom obrazovanju)

- (1) Svaki učenik ima jednako pravo pristupa i jednake mogućnosti učešća u dualnom obrazovanju, bez diskriminacije po osnovu spola ili po bilo kojoj drugoj osnovi.
- (2) Jednak pristup i jednake mogućnosti podrazumijevaju osiguranje jednakih uslova i prilika za sve učenike za obavljanje učenja kroz rad.
- (3) Škola i poslovni subjekt ne smiju vršiti diskriminaciju zasnovanu na spolu ili drugim ličnim svojstvima učenika u vezi sa uslovima prijema i odabira učenika za učenje kroz rad, finansijskim i materijalnim obezbjeđenjem učenika te praćenjem, vrednovanjem i ocjenjivanjem rezultata rada učenika u toku učenja kroz rad.

Član 6.

(Ciljevi dualnog obrazovanja)

Prioritetni ciljevi dualnog obrazovanja su:

- a) učenicima će se omogućiti profesionalni i lični razvoj i integracija u društvo, a posebno u poslovnom životu, kao i sticanje sposobnosti i spremnosti za poslovnu fleksibilnost i prisustvo u poslovnom životu;
- b) stvorit će se uvjeti za brže zapošljavanje nakon završene srednje škole;
- c) osigurat će se sticanje primjenjivih znanja, razvijanje i jačanje sposobnosti, kompetencija i vještina u skladu sa zahtjevima tržišta rada;
- d) stvorit će se uska povezanost privrednih potreba i obrazovnog sistema;
- e) privreda Kantona Sarajevo će dobiti na konkurentnosti;
- f) stvorit će se pretpostavke za smanjenje stope nezaposlenosti;
- g) doprinijet će se konkurentnosti poslovnih subjekata, kroz usklađivanje ponude i potražnje na tržištu radne snage;
- h) osigurat će se transparentnost sistema dualnog obrazovanja i
- i) izgradit će se vlastiti standardi stručnog obrazovanja i obuke koji će biti usklađeni sa standardima zemalja Evropske unije.

Član 7.

(Status učenika u dualnom obrazovanju)

- (1) Učenik koji pohađa nastavu u vidu učenja kroz rad zadržava svoj status definisan propisima iz oblasti srednjeg obrazovanja.
- (2) Učenik iz stava (1) ovog člana nema status radnika niti lica angažovanog za bilo koji oblik rada za poslodavca predviđen propisima koji regulišu oblast radnih odnosa.

DIO TREĆI - OSTVARIVANJE DUALNOG OBRAZOVANJA

POGLAVLJE I. NAČIN REALIZACIJE UČENJA KROZ RAD

Član 8.

(Nastavni plan i program učenja kroz rad)

- (1) Nastavni planovi i programi trebaju biti zasnovani na ishodima učenja i standardu zanimanja.
- (2) Ministarstvo za odgoj i obrazovanje Kantona Sarajevo (u daljem tekstu: Ministarstvo) donosi nastavne planove i programe/predmetne kurikulare koji su prilagođeni za dualno obrazovanje, na prijedlog Javne ustanove „Institut za razvoj preduniverzitetskog obrazovanja“ (u daljem tekstu: Institut).

- (3) Dio nastave iz stručno-teorijskih predmeta također treba da se realizira kroz učenje kroz rad.
- (4) Prilikom izrade nastavnog plana i programa u obzir se trebaju uzeti potrebe lokalnog tržišta rada, što će se ostvariti direktnom međusobnom saradnjom škola, Ministarstva, Ministarstva privrede Kantona Sarajevo (u daljem tekstu: Ministarstvo privrede), poslovnih subjekata iz Kantona Sarajevo, Privredne komore Kantona Sarajevo (u daljem tekstu: Privredna komora), kao i Javne ustanove „Služba za zapošljavanje Kantona Sarajevo“ (u daljem tekstu: Služba za zapošljavanje), te ostalih subjekata u čijoj se direktnoj ili indirektnoj nadležnosti nalazi dualno obrazovanje.

Član 9.

(Obim, period i mjesto realizacije učenja kroz rad)

- (1) Učenje kroz rad u školama u trogodišnjem trajanju se realizira od drugog razreda kod poslovnog subjekta i to:
 - a) u drugom razredu dva dana,
 - b) u trećem razredu tri dana,sedmično.
- (2) Učenje kroz rad u školama u četverogodišnjem trajanju se realizira od drugog razreda kod poslovnog subjekta i to:
 - a) u drugom razredu dva dana,
 - b) u trećem razredu dva dana,
 - c) u četvrtom razredu dva dana,sedmično.
- (3) Izuzetno od st. (1) i (2) ovog člana, učenje kroz rad se može realizirati kod poslovnog subjekta jedan dan sedmično u prvom razredu, ukoliko se utvrdi da postoji interes poslovnog subjekta.
- (4) Poslovni subjekat je dužan interes za izvođenje učenja kroz rad u prvom razredu iskazati u izjavi iz člana 10. stav (2) ovog zakona.
- (5) Učenje kroz rad se realizuje u skladu sa školskim kalendarom tokom školske godine u periodu 8 do 19 sati, najduže šest sati dnevno, u skladu s planom realizacije učenja kroz rad.
- (6) Učenje kroz rad se realizuje u cjelosti kod jednog, odnosno više poslovnih subjekata – članova konzorcija u skladu sa planom realizacije učenja kroz rad.
- (7) Izuzetno od stava (6) ovog člana, učenje kroz rad ili dio učenja kroz rad može se alternativno realizovati i u školi u vidu praktične nastave, ukoliko ga kod poslovnog subjekta nije moguće ostvariti u cjelini, pri čemu se ne ostvaruje nagrada iz člana 48. ovog zakona.

Član 10.

(Upis učenika)

- (1) Struktura upisa učenika u škole po područjima rada za obrazovne profile u dualnom obrazovanju utvrđuje se u skladu s potrebama privrede, prijedloga poslovnih subjekata te mogućnostima daljeg školovanja budućih učenika.
- (2) Potrebe privrede utvrđuju se na osnovu izjava poslovnih subjekata o uključivanju u dualno obrazovanje.
- (3) Izjava iz stava (2) ovog člana minimalno sadrži sljedeće podatke: naziv, sjedište, identifikacioni broj poslovnog subjekta, obrazovni profil za koji poslovni subjekat može organizovati učenje kroz rad, informaciju da li postoji interes poslovnog subjekta da učenje kroz rad izvodi i tokom prvog razreda školovanja, broj učenika koji poslovni subjekat može da primi na učenje kroz rad, podatke o mjestu izvođenja učenja kroz rad i prijedlog škole koja realizuje traženi obrazovni profil.

- (4) Poslovni subjekat je dužan da Institutu dostavi izjavu iz stava (2) ovog člana najkasnije do kraja kalendarske godine koja prethodi školskoj godini u kojoj otpočinje realizacija obrazovnog profila u dualnom obrazovanju.
- (5) Institut dostavlja Ministarstvu plan za uključivanje poslovnih subjekata u dualno obrazovanje za narednu školsku godinu po školama i obrazovnim profilima, najkasnije do marta tekuće godine za narednu školsku godinu.
- (6) Škole u saradnji sa Ministarstvom predlažu plan upisa učenika, a odluku o upisu učenika donosi Vlada Kantona Sarajevo (u daljem tekstu: Vlada Kantona).
- (7) U pripremi plana upisa iz stava (6) ovog člana potrebno je obezbijediti uslove za uključivanje učenika sa teškoćama u razvoju i učenika iz osjetljivih grupa uz pružanje adekvatne podrške prilikom izbora zanimanja.
- (8) U izradi prijedloga plana upisa iz stava (6) ovog člana za svaku školsku godinu učestvuju Privredna komora, poslovni subjekti iz Kantona Sarajevo i Služba za zapošljavanje u saradnji sa školama u Kantonu Sarajevo i Ministarstvom.
- (9) Raspoređivanje učenika za učenje kroz rad škola vrši uz saradnju sa učenikom, roditeljem, odnosno drugim zakonskim zastupnikom učenika, i poslovnim subjektom.

Član 11.

(Karijerno vođenje i savjetovanje učenika u dualnom obrazovanju)

- (1) Škola podstiče i prati karijerni razvoj učenika.
- (2) Škola formira tim za karijerno vođenje i savjetovanje (u daljem tekstu: tim), u cilju jačanja vještina upravljanja karijerom i donošenja promišljenih i odgovornih odluka o profesionalnoj budućnosti učenika.
- (3) Tim čine predstavnici škole sa odgovarajućim pedagoškim znanjima i vještinama, strukovnih udruženja, jedinice lokalne samouprave i poslovnih subjekata. Sastancima tima mogu da prisustvuju i predstavnici roditelja, odnosno drugih zakonskih zastupnika učenika, i vijeća učenika.
- (4) Tim saraduje sa osnovnim školama, naročito u procesu planiranja upisa učenika u škole.
- (5) Bliže uslove o načinu rada, aktivnostima i sastavu tima propisuje ministar odgoja i obrazovanja Kantona Sarajevo (u daljem tekstu: ministar), na prijedlog Instituta.

Član 12.

(Ostvarivanje dualnog obrazovanja)

- (1) U dualnom obrazovanju učenik pohađa nastavu u školi i uči kroz rad kod poslovnog subjekta, u skladu sa nastavnim planom i programom.
- (2) Škola je odgovorna za ostvarivanje dijela nastavnog plana i programa koji se realizira u školi.
- (3) Škola ostvaruje dio nastavnog plana i programa koji se odnosi na stručno-teorijsku nastavu i vježbe i prati ostvarivanje plana realizacije učenja kroz rad kod poslovnog subjekta.
- (4) Poslovni subjekat ostvaruje dio nastavnog plana i programa koji se odnosi na učenje kroz rad.
- (5) Poslovni subjekat je odgovoran za sistematično i kvalitetno izvođenje učenja kroz rad u skladu sa nastavnim planom i programom i planom realizacije učenja kroz rad za određeni obrazovni profil.
- (6) Međusobni odnosi škole i poslovnog subjekta uređuju se ugovorom, u skladu sa ovim zakonom.

POGLAVLJE II. PRAVA, OBAVEZE I OVLAŠTENJA

Član 13.

(Obaveze i ovlaštenja Ministarstva)

U cilju organizacije, izvođenja i praćenja dualnog obrazovanja Ministarstvo ima sljedeća ovlaštenja i obaveze:

- a) izraditi popis obrazovnih profila za koje se izvodi učenje kroz rad kod poslovnog subjekta;
- b) izraditi i donijeti nastavne planove i programe na osnovu ishoda učenja i standarda zanimanja;
- c) provoditi nadzor nad primjenom ovog zakona;
- d) učestvovati u radu komisije za polaganje ispita za mentora;
- e) donositi odluke o svim pitanjima koja nisu regulisana ovim zakonom ili drugim propisima, a tiču se organizacije i izvođenja dualnog obrazovanja;
- f) donijeti podzakonske akte u skladu sa ovim zakonom;
- g) snosi troškove izdavanja potvrde, vođenja upisa u registar iz člana 24. ovog zakona i
- h) postupiti u skladu sa članom 25. st. (4) i (5) ovog zakona.

Član 14.

(Obaveze i ovlaštenja Ministarstva privrede)

U cilju organizacije, izvođenja i praćenja dualnog obrazovanja Ministarstvo privrede ima sljedeća ovlaštenja i obaveze:

- a) priprema Program utroška sredstava za finansiranje/sufinansiranje procesa dualnog obrazovanja u poslovnim subjektima (u daljnjem tekstu: Program utroška sredstava)
- b) učestvuje u provođenju postupka za utvrđivanje ispunjenosti uslova za izvođenje učenja kroz rad i
- c) dostavlja Vladi Kantona informaciju iz člana 61. ovog zakona.

Član 15.

(Obaveze i ovlaštenja Ministarstva saobraćaja Kantona Sarajevo)

U cilju organizacije, izvođenja i praćenja dualnog obrazovanja Ministarstvo saobraćaja Kantona Sarajevo ima ovlaštenje i obavezu da obezbijedi, u saradnji sa Gradom, općinama i drugim zainteresovanim subjektima sredstava za subvenciju troškova prijevoza redovnih učenika škola za srednje stručno obrazovanje i obuku kao javnih ustanova od mjesta stanovanja do mjesta izvođenja učenja kroz rad odnosno od škole do mjesta izvođenja učenja kroz rad, i u suprotnim pravcima, a najviše u visini cijene učeničke mjesečne karte u javnom saobraćaju, ukoliko je udaljenost od škole do mjesta izvođenja učenja kroz rad odnosno od mjesta stanovanja do mjesta izvođenja učenja kroz rad veća od dva kilometra te ukoliko navedene destinacije nisu pokrivena prijevozom koji se učenicima obezbjeđuje na osnovu zakona koji reguliše oblast srednjeg obrazovanja.

Član 16.

(Obaveze i ovlaštenja Privredne komore)

Privredna komora pruža, u što je moguće većoj mjeri, podršku pri organizaciji, izvođenju i praćenju dualnog obrazovanja i njegovom unapređenju, te ima sljedeće obaveze i ovlaštenja:

- a) učestvovati u izradi plana upisa učenika;
- b) poticati i informisati poslovnog subjekta o učešću u izvođenju učenja kroz rad;
- c) pružati podršku i pomoć poslovnim subjektima u procesu izvođenja učenja kroz rad;
- d) pružati podršku i pomoć poslovnim subjektima u procesu stvaranja konzorcija;
- e) sprovoditi ispitivanja i istraživanja o potrebama poslovnih subjekata, zahtjevima i mjerama poboljšanja učenja kroz rad;
- f) pružati preporuke Ministarstvu o načinima unapređenja učenja kroz rad i

- g) oglašavati prijave potreba poslovnih subjekata i škola za izvođenjem učenja kroz rad.

Član 17.

(Ovlaštenja i obaveze poslovnog subjekta)

(1) Poslovni subjekt ima sljedeća ovlaštenja i obaveze u organizovanju i izvođenju učenja kroz rad:

- a) izvršiti odabir učenika koje će primiti na učenje kroz rad;
 - b) organizovati implementaciju plana realizacije učenja kroz rad i osigurati uslove za ostvarenje ciljeva učenja kroz rad u zadanom roku;
 - c) obezbijediti mentora;
 - d) staviti učenicima na raspolaganje neophodna sredstva za izvođenje učenja kroz rad;
 - e) pružiti učenicima obuku iz oblasti zaštite na radu i izvršiti provjeru sposobnosti učenika za sigurno obavljanje zadataka nakon okončane obuke, te sprovesti ostale mjere zaštite na radu učenika u skladu sa važećim propisima iz oblasti zaštite na radu;
 - f) učestvovati u praćenju, provjeravanju i ocjenjivanju učenika tokom učenja kroz rad, uključujući završni ispit i maturu;
 - g) obezbijediti učenicima sa kojima je zaključio ugovor o učenju kroz rad besplatnu ishranu ili im isplatiti odgovarajuću naknadu za troškove ishrane;
 - h) saradivati sa koordinatorom praktične nastave i omogućiti mu pristup mjestu izvođenja učenja kroz rad, kao i uvid u propisanu dokumentaciju, na zahtjev škole;
 - i) finansirati/sufinansirati novčanu nagradu za učenje kroz rad učeniku sa kojim je zaključio ugovor o učenju kroz rad;
 - j) voditi pisanu dokumentaciju o izvođenju učenja kroz rad;
 - k) pružati informacije o izvođenju učenja kroz rad na zahtjev Privredne komore ili Ministarstva;
 - l) učestvovati u rješavanju konfliktnih situacija na relaciji poslovni subjekt - učenik - škola;
 - m) osigurati povjerljivost ličnih podataka učenika u skladu sa važećim propisima o zaštiti ličnih podataka;
 - n) dostaviti Institutu podatke o potrebi za izvođenjem učenja kroz rad u prostorijama poslovnog subjekta u skladu sa članom 10. stav (4) ovog zakona
 - o) voditi evidencije o učenicima koji su kod poslovnog subjekta na učenju kroz rad u skladu sa Pravilnikom o sadržaju i načinu vođenja evidencije o radnicima i drugim licima angažovanim na radu ("Službene novine Federacije Bosne i Hercegovine" broj 92/16) i
 - p) izdati učeniku potvrdu o broju dana provedenih na učenju kroz rad u stuci za vrijeme realizacije praktične nastave.
- (2) Poslovni subjekt može zadužiti učenika samo na onim poslovima koji osiguravaju sticanje kompetencija za određeni obrazovni profil u skladu sa nastavnim planom i programom i planom realizacije učenja kroz rad.
- (3) Ovlaštenja i obaveze iz stava (1) ovog člana poslovni subjekti koji su udruženi u konzorcij imaju isključivo u pogledu izvođenja odgovarajućeg dijela učenja kroz rad.
- (4) Detaljna ovlaštenja i obaveze poslovnog subjekta u pogledu organizovanja i izvođenja učenja kroz rad definišu se ugovorom o dualnom obrazovanju i ugovorom o učenju kroz rad.

Član 18.

(Obaveze i ovlaštenje škole)

(1) U cilju organizacije, izvođenja i praćenja dualnog obrazovanja, škola ima sljedeća ovlaštenja i obaveze:

- a) ostvariti programski sadržaj propisan nastavnim planom i programom;
- b) imenovati koordinatora;

- c) zaključiti ugovor o osiguranju učenika u slučaju nezgode i povrede na radu u ime učenika koji su raspoređeni na učenje kroz rad kod poslovnih subjekata;
 - d) voditi evidencije o zaključenim ugovorima o dualnom obrazovanju i ugovorima o učenju kroz rad;
 - e) saradivati sa poslovnim subjektom i pružati informacije o učenicima koji su raspoređeni na učenje kroz rad kod poslovnog subjekta;
 - f) ocjenjivati učenike;
 - g) saradivati sa mentorom, obilaziti mjesta izvođenja učenja kroz rad i vršiti uvid u propisanu dokumentaciju;
 - h) pružati informacije o organizaciji i izvođenju učenja kroz rad na zahtjev Privredne komore ili Ministarstva;
 - i) informisati Insitut o potrebi za izvođenjem učenja kroz rad kod poslovnih subjekata;
 - j) učestvovati u rješavanju konfliktnih situacija;
 - k) osigurati povjerljivost ličnih podataka učenika u skladu sa propisima o zaštiti ličnih podataka;
 - l) osigurati povjerljivost poslovne tajne poslovnog subjekta;
 - m) obezbijediti izvođenje učenja kroz rad u školskim radionicama, ukoliko se učenje kroz rad ne može provesti u prostorijama poslovnog subjekta;
 - n) obezbijediti sticanje odgovarajućih znanja učenika iz oblasti zaštite na radu, u obimu koji odgovara potrebi struke i obrazovnog profila za koje se vrši obrazovanje putem nastavnog plana i programa i
 - o) druga ovlaštenja i obaveze predviđena ovim zakonom i propisima o srednjem obrazovanju;
- (2) Ukoliko škola nije ispunila obavezu iz stava (1) tačka c) ovog člana, učenici ne mogu pohađati učenje kroz rad kod poslovnog subjekta.
- (3) Detaljna ovlaštenja i obaveze škole u pogledu organizovanja i izvođenja učenja kroz rad kod poslovnog subjekta definiraju se ugovorom o dualnom obrazovanju i ugovorom o učenju kroz rad.

Član 19. **(Prava i obaveze učenika)**

U pogledu izvođenja učenja kroz rad učenik ima sljedeća prava i obaveze:

- a) redovno pohađati nastavu u vidu učenja kroz rad, te savjesno i odgovorno ispunjavati radne aktivnosti koje su mu dodijeljene;
- b) izvršiti uplatu osiguranja iz člana 18. stav (1) tačka c) ovog zakona prije početka školske godine;
- c) postupati u skladu sa uputstvima i nalogima mentora ili drugih lica ovlaštenih za davanje uputa i naloga, ukoliko je upoznat s tim da su ta lica ovlaštena za davanje uputa i naloga;
- d) ponašati se u skladu sa uputstvima poslovnog subjekta, te propisima o zaštiti i sigurnosti na radu i zdravstvenoj zaštiti, sigurnosti od požara, sanitarno-tehničkim i higijenskim zahtjevima;
- e) nositi radnu i zaštitnu odjeću koju mu poslovni subjekt stavi na raspolaganje;
- f) savjesno rukovati alatom, mašinama i ostalom opremom i korištenje alata, mašina i ostale opreme samo u vezi sa povjerenim mu zadacima;
- g) poštovati interne akte poslovnog subjekta;
- h) čuvati imovinu i poslovnu tajnu poslovnog subjekta za vrijeme i nakon prestanka učenja kroz rad;
- i) u slučaju izostanka sa učenja kroz rad, obavezno i bez odgađanja informisati poslovnog subjekta i mentora o izostanku i razlozima izostanka;

- j) dostaviti školi primjerak ugovora o učenju kroz rad neposredno nakon zaključivanja ugovora sa poslovnim subjektom, a u cilju evidentiranja ugovora o učenju kroz rad;
- k) podvrgnuti se ljekarskom pregledu prije početka učenja kroz rad kojim se dokazuje njegova opća zdravstvena sposobnost i sposobnost za učenje kroz rad za određeni obrazovni profil kod poslovnog subjekta, te mjerama zdravstvenog nadzora predviđenim propisima koji regulišu oblast zaštite stanovništva od zaraznih bolesti;
- l) dostaviti uvjerenje o zdravstvenoj sposobnosti i sanitarnu knjižicu poslovnom subjektu, ukoliko je sanitarna knjižica neophodna za izvođenje učenja kroz rad kod poslovnog subjekta i
- m) druga prava i obaveze predviđene ovim zakonom i propisima iz oblasti srednjeg obrazovanja.

Član 20.

(Zaštita prava učenika)

- (1) Zaštita prava učenika u dualnom obrazovanju ostvaruje se u skladu sa propisima kojima se uređuju osnove sistema obrazovanja, srednje obrazovanje, oblast zaštite na radu, propisima kojima se uređuje zabrana obavljanja opasnog rada za djecu, ovim zakonom i drugim primjenjivim propisima.
- (2) Tokom učenja kroz rad zabranjeni su diskriminacija učenika, fizičko, psihičko, socijalno, seksualno, digitalno i svako drugo nasilje, zlostavljanje i zanemarivanje učenika, u skladu sa zakonom kojim se uređuju osnove sistema obrazovanja i odgoja i drugim zakonima.

DIO ČETVRTI - POSTUPAK ZA UTVRĐIVANJE ISPUNJENOSTI USLOVA ZA IZVOĐENJE UČENJA KROZ RAD

Član 21.

(Uslovi za izvođenje učenja kroz rad kod poslovnog subjekta)

- (1) Učenje kroz rad se može izvoditi kod poslovnog subjekta ukoliko poslovni subjekt ispunjava sljedeće uslove:
 - a) ako obavlja djelatnost koja omogućava prenošenje na učenike znanja i stručnih kompetencija čije sticanje je predviđeno nastavnim planom i programom;
 - b) ako raspolaže neophodnim prostorom, opremom i sredstvima za rad za određeni obrazovni profil;
 - c) ako za potrebe izvođenja učenja kroz rad odredi mentora koji ispunjava uslove definisane ovim zakonom;
 - d) ako obezbjeđuje primjenu mjera zaštite na radu u skladu sa propisima iz oblasti zaštite na radu;
 - e) ako nad poslovnim subjektom nije otvoren stečajni postupak ili pokrenut postupak likvidacije i
 - f) ako odgovorno lice kod poslovnog subjekta i mentor nisu pravosnažno osuđivani presudom za krivično djelo za koje je izrečena безусловna kazna zatvora u trajanju od najmanje tri mjeseca, kao i za krivična djela nasilje u porodici, oduzimanje djeteta ili maloljetnika, zapuštanje ili zlostavljanje djeteta ili maloljetnika ili rodoskrvnuće, krivična djela iz grupe krivičnih djela protiv spolne slobode i morala, protiv privrede, protiv službene i druge odgovorne funkcije, protiv javnog reda i pravnog prometa i protiv čovječnosti i drugih dobara zaštićenih međunarodnim pravom, bez obzira na izrečenu krivičnu sankciju, nisu pravosnažno osuđivani za prekršaj iz oblasti radnih odnosa za koji komisija iz člana 23. stav (2) ovog zakona ocijeni da je nespojiv sa organizacijom učenja kroz rad, i za koje nije, u skladu sa zakonom, utvrđeno diskriminatorno ponašanje.
- (2) Ukoliko jedan poslovni subjekt nije u mogućnosti obezbijediti izvođenje cjelokupnog programa učenja kroz rad predviđenog nastavnim planom i programom, izvođenje učenja

kroz rad se može povjeriti prema više poslovnih subjekata koji su udruženi u konzorcij na način da se svakom od članova konzorcija povjeri izvođenje pojedinog dijela ili dijelova programa učenja kroz rad s ciljem da konzorcij zadovolji potrebe cjelokupnog programskog sadržaja, pod uslovom da konzorcij kao zajednica ispunjava uslove iz stava (1) ovog člana.

- (3) Poslovni subjekti koji su udruženi u konzorcij moraju pojedinačno ispunjavati uslove iz stava (1) ovog člana isključivo u pogledu organizovanja i izvođenja dijela programa učenja kroz rad.

Član 22.

(Pokretanje postupka za utvrđivanje ispunjenosti uslova za izvođenje učenja kroz rad)

- (1) Poslovni subjekt, odnosno konzorcij, podnosi Ministarstvu zahtjev za provjeru ispunjenosti uslova za izvođenje učenja kroz rad (u daljnjem tekstu: zahtjev).
- (2) Poslovni subjekt podnosi Ministarstvu zahtjev iz stava (1) ovog člana najkasnije šest mjeseci prije početka školske godine u kojoj otpočinje obavljanje učenja kroz rad, a u izuzetnim slučajevima i u kraćem roku.
- (3) Zahtjev se podnosi u pisanom obliku.
- (4) Zahtjev treba da sadrži osnovne podatke o poslovnom subjektu odnosno članovima konzorcija, broju slobodnih mjesta za izvođenje učenja kroz rad određenog obrazovnog profila i druge informacije od značaja za izvođenje učenja kroz rad kod poslovnog subjekta.

Član 23.

(Utvrdjivanje ispunjenosti uslova za izvođenje učenja kroz rad)

- (1) Provjeru ispunjenosti uslova iz člana 21. ovog zakona po podnesenom zahtjevu vrši Ministarstvo, koji snosi troškove postupka.
- (2) Najkasnije u roku od 15 dana od dana prijema zahtjeva Ministarstvo imenuje komisiju koja provodi postupak utvrđivanja ispunjenosti uslova za izvođenje učenja kroz rad kod poslovnog subjekta odnosno konzorcija za određeni obrazovni profil ili grupu srodnih obrazovnih profila.
- (3) Komisija iz stava (2) ovog člana obavezno ima predstavnika poslovnog subjekta, predstavnika Ministarstva i predstavnika Ministarstva privrede te broji ukupno tri člana, pri čemu svi članovi trebaju biti stručnjaci za odgovarajući obrazovni profil koji se registruje.
- (4) Ministarstvo, na prijedlog komisije iz stava (2) ovog člana, donosi odluku o ispunjenosti uslova za izvođenje učenja kroz rad u roku od 15 dana od dana prijema prijedloga komisije.
- (5) Rješenje kojim je utvrđeno da poslovni subjekt ispunjava uslove propisane članom 21. ovog zakona važi četiri školske godine, nakon čega je poslovni subjekt dužan da pokrene postupak provjere ispunjenosti uslova za izvođenje učenja kroz rad u skladu sa članom 22. ovog zakona.
- (6) Poslovnom subjektu za kojeg je utvrđeno da ispunjava uslove za izvođenje učenja kroz rad Ministarstvo izdaje potvrdu o ispunjenosti uslova za izvođenje učenja kroz rad (u daljem tekstu: potvrda).
- (7) Rješenje Ministarstva kojim je utvrđeno da poslovni subjekt ne ispunjava uslove za izvođenje učenja kroz rad je konačno u upravnom postupku i protiv istog se može pokrenuti upravni spor kod nadležnog suda.
- (8) Ukoliko poslovni subjekt prestane da ispunjava uslove propisane članom 21. ovog zakona, Ministarstvo, na prijedlog komisije iz stava (2) ovog člana, donosi rješenje o prestanku ispunjenosti uslova za izvođenje učenja kroz rad i ovo rješenje je konačno u upravnom postupku, i protiv istog se može pokrenuti upravni spor kod nadležnog suda.
- (9) Organizacija, sastav i način rada komisije iz stava (2) ovog člana bliže se uređuju opštim aktima Ministarstva.

Član 24.

(Registar poslovnih subjekata sa odobrenjem za izvođenje učenja kroz rad)

- (1) Ministarstvo vodi i redovno ažurira registar poslovnih subjekata za koje je utvrđeno da ispunjavaju uslove za izvođenje učenja kroz rad.
- (2) Registar iz stava (1) ovog člana vodi se kao jedinstvena elektronska baza podataka, a podaci iz registra objavljuju se na zvaničnoj internet stranici Ministarstva.
- (3) U registar iz stava (1) ovog člana, upisuju se podaci o registarskom broju potvrde, nazivu i identifikacionim broju poslovnog subjekta, o rješenju o ispunjenosti uslova za izvođenje učenja kroz rad, o imenu, prezimenu i funkciji odgovornog lica kod poslovnog subjekta, broju i datumu rješenja o prestanku ispunjenosti uslova za izvođenje učenja kroz rad.
- (4) Troškove izdavanja potvrde, vođenja i upisa u registar iz stava (1) ovog člana, snosi Ministarstvo iz sredstava obezbijedenih iz Budžeta Kantona Sarajevo u skladu sa odredbama člana 13. tačka g) ovog zakona.
- (5) Način vođenja registra iz stava (1) ovog člana bliže se uređuje podzakonskim aktom Ministarstva.

DIO PETI - UGOVORI U DUALNOM OBRAZOVANJU

Član 25.

(Vrste ugovora)

- (1) U pogledu dualnog obrazovanja zaključuju se dvije vrste ugovora:
 - a) ugovor o dualnom obrazovanju kojim se regulišu odnosi između škole i poslovnog subjekta odnosno članova konzorcija i
 - b) ugovor o učenju kroz rad kojim se regulišu odnosi između poslovnog subjekta i učenika odnosno zakonskog zastupnika učenika.
- (2) Ukoliko se učenje kroz rad izvodi kod više poslovnih subjekata udruženih u konzorcij, svaki od poslovnih subjekata pojedinačno zaključuje ugovore iz stava (1) ovog člana.
- (3) Ugovor iz stava (1) tačka b) ovog člana zaključuje se najkasnije do 30. septembra tekuće školske godine.
- (4) Ministarstvo je dužno Ministarstvu privrede dostaviti ugovore iz stava (1) ovog člana najkasnije do 15. oktobra tekuće školske godine.
- (5) Izuzetno, iz opravdanih razloga, ugovori iz stava (1) ovog člana mogu biti zaključeni tokom cijele školske godine, a koji se odmah po zaključenju dostavljaju Ministarstvu, a zatim Ministarstvu privrede.

POGLAVLJE I. UGOVOR O DUALNOM OBRAZOVANJU

Član 26.

(Forma ugovora o dualnom obrazovanju)

Ugovor o dualnom obrazovanju se zaključuje između škole i poslovnog subjekta u pisanoj formi.

Član 27.

(Sadržaj ugovora o dualnom obrazovanju)

- (1) Obavezni elementi ugovora o dualnom obrazovanju su:
 - a) naziv, sjedište, ime i prezime lica ovlaštenog za zastupanje i identifikacioni broj poslovnog subjekta kao i registarski broj potvrde;
 - b) naziv, sjedište škole i ime i prezime direktora škole;
 - c) obrazovni profil koji je predmet ugovora;

- d) obaveza poslovnog subjekta da obezbijedi učenje kroz rad o sopstvenom trošku u skladu sa članom 17. ovog zakona uz mogućnost da potrebna sredstva u vidu poticaja obezbijede institucije i/ili drugi organi u čijoj nadležnosti je oblast zapošljavanje i rada na nivou Kantona ili Federacije Bosne i Hercegovine, kao i ostalim nivoima vlasti;
 - e) obaveze škole u vezi sa realizacijom učenja kroz rad;
 - f) obaveze poslovnog subjekta u vezi sa realizacijom učenja kroz rad;
 - g) plan realizacije učenja kroz rad;
 - h) mjesto i vremenski raspored realizacije učenja kroz rad;
 - i) maksimalan broj učenika koji je poslovni subjekt u mogućnosti primiti;
 - j) broj mentora koje poslovni subjekt obezbjeđuje;
 - k) period trajanja ugovora;
 - l) razlozi za prestanak važenja i za raskid ugovora;
 - m) način rješavanja eventualnih sporova i
 - n) datum i potpisi ugovornih strana.
- (2) Ugovor o dualnom obrazovanju može sadržavati i dodatne elemente ukoliko nisu u suprotnosti sa ovim zakonom ili drugim primjenjivim propisima.

Član 28.

(Zaključivanje ugovora o dualnom obrazovanju)

- (1) Škola zaključuje ugovor o dualnom obrazovanju s jednim ili više poslovnih subjekata ili sa članovima konzorcija koji ispunjavaju uslove iz člana 21. ovog zakona i koji posjeduje potvrdu iz člana 23. stav (6) ovog zakona, u cilju obezbjeđenja uslova za ostvarivanje svih sadržaja učenja kroz rad definisanih određenim nastavnim planom i programom.
- (2) Škola će prilikom odabira poslovnog subjekta za zaključenje ugovora iz stava (1) ovog člana sve poslovne subjekte tretirati na jednak način.
- (3) Prilikom izbora poslovnog subjekta ili konzorcija škola je u obavezi da se rukovodi najboljim interesom učenika.
- (4) Poslovni subjekt koji ispunjava uslove propisane članom 21. ovog zakona i posjeduje potvrdu iz člana 23. stav (6) ovog zakona, može da zaključi ugovor o dualnom obrazovanju s jednom ili više škola.
- (5) O zaključenom ugovoru iz stava (1) ovog člana škola obavještava Ministarstvo najkasnije u roku od osam dana od dana zaključivanja ugovora.

Član 29.

(Objavljivanje na zvaničnoj internet stranici)

Škola i Ministarstvo najkasnije, u roku od 15 dana od dana zaključivanja ugovora o dualnom obrazovanju, objavljuju na svojoj zvaničnoj internet stranici osnovne informacije o planu realizacije učenja kroz rad i druge informacije od značaja za izvođenje učenja kroz rad.

Član 30.

(Raskid ugovora o dualnom obrazovanju od strane poslovnog subjekta)

- (1) Poslovni subjekt ima pravo raskida ugovora o dualnom obrazovanju ukoliko:
 - a) je školi zabranjen rad ili je ukinuta u skladu sa zakonom;
 - b) škola prestane da ispunjava propisane uslove za obrazovni profil u kojem poslovni subjekt realizuje učenje kroz rad;
 - c) škola ne ispunjava obaveze predviđene ugovorom o dualnom obrazovanju;
 - d) nastupe nepredviđene tehnološke, ekonomske ili organizacione promjene kod poslovnog subjekta koje sprečavaju, otežavaju ili bitno mijenjaju obavljanje djelatnosti i
 - e) nastupe drugi slučajevi predviđeni propisima koji regulišu oblast obligacionih odnosa.

- (2) Poslovni subjekat je dužan da bez odlaganja obavijesti Ministarstvo o raskidu i razlozima za raskid ugovora o dualnom obrazovanju.

Član 31.

(Raskid ugovora o dualnom obrazovanju od strane škole)

- (1) Škola ima pravo raskida ugovora o dualnom obrazovanju ukoliko:
- a) je doneseno rješenje o prestanku ispunjenosti uslova za izvođenje učenja kroz rad iz člana 23. stav (8) ovog zakona;
 - b) poslovni subjekt ne ispunjava obaveze predviđene ugovorom o dualnom obrazovanju;
 - c) poslovni subjekt izvrši povredu prava učenika propisanih ovim zakonom i drugim primjenjivim propisima;
 - d) ukoliko nad poslovnim subjektom bude pokrenut postupak stečaja ili likvidacije, odnosno odgovarajući postupak koji za cilj ima prestanak postojanja poslovnog subjekta i
 - e) nastupe drugi slučajevi predviđeni propisima koji regulišu oblast obligacionih odnosa.
- (2) Škola je dužna da bez odlaganja obavijesti Ministarstvo o raskidu i razlozima za raskid ugovora o dualnom obrazovanju.

Član 32.

(Posljedice raskida ugovora o dualnom obrazovanju)

- (1) Ako se ugovor o dualnom obrazovanju raskida iz razloga propisanih u članu 30. stav (1) tač. a), b) i c) ovog zakona ili iz drugih razloga koji su doveli do prestanka pružanja dualnog obrazovanja u određenoj školi, nastavak obrazovanja je dužna obezbijediti druga škola koju odredi Ministarstvo.
- (2) Ako je ugovor o dualnom obrazovanju raskinut iz razloga propisanih u članu 30. stav (1) tačka d) ovog zakona, učenje kroz rad učenicima obezbjeđuje škola kod drugog poslovnog subjekta s kojim ima zaključen ugovor o dualnom obrazovanju.
- (3) Ako je ugovor o dualnom obrazovanju raskinut iz razloga propisanih u članu 31. ovog zakona, učenje kroz rad organizuje škola, uz podršku Ministarstva kod drugog poslovnog subjekta s kojim zaključi ugovor o dualnom obrazovanju.
- (4) Ukoliko nakon raskida ugovora o dualnom obrazovanju nije moguće organizovati učenje kroz rad u skladu sa prethodnim stavovima ovog člana, škola je dužna da obezbijedi učeniku uslove da završi započeto školovanje u skladu sa propisima kojima se uređuje srednje obrazovanje i odgoj.

POGLAVLJE II. UGOVOR O UČENJU KROZ RAD

Član 33.

(Forma ugovora o učenju kroz rad)

Ugovor o učenju kroz rad zaključuju poslovni subjekt i učenik, odnosno roditelj ili drugi zakonski zastupnik učenika u pisanoj formi.

Član 34.

(Zaključivanje ugovora)

- (1) Ugovor o učenju kroz rad zaključuje se najkasnije pet radnih dana prije početka realizacije učenja kroz rad.
- (2) Poslovni subjekat i škola su dužni voditi evidenciju o zaključenim ugovorima o učenju kroz rad.

Član 35.

(Sadržaj ugovora o učenju kroz rad)

- (1) Obavezni elementi ugovora o učenju kroz rad su:

- a) naziv, sjedište, ime i prezime lica ovlaštenog za zastupanje, identifikacioni broj poslovnog subjekta kao i registarski broj potvrde;
- b) ime i prezime, jedinstveni matični broj, adresa stanovanja, odjeljenje/razred, broj u matičnoj knjizi učenika;
- c) ime i prezime, jedinstveni matični broj, adresa stanovanja roditelja odnosno drugog zakonskog zastupnika učenika;
- d) identifikacioni podaci o školi koju učenik pohađa;
- e) naziv obrazovnog profila;
- f) dokaz o posjedovanju opće zdravstvene sposobnosti i dokaz o zadovoljavanju propisanih posebnih zdravstvenih uslova za otpočinjanje sa učenjem kroz rad za određeni obrazovni profil (ljekarsko uvjerenje i sanitarna knjižica, ukoliko je sanitarna knjižica neophodna za obavljanje učenja kroz rad);
- g) obaveza poslovnog subjekta da organizuje i realizuje učenje kroz rad u skladu s nastavnim planom i programom i planom realizacije učenja kroz rad;
- h) ukoliko se nastavni plan i program ostvaruje na jeziku nacionalne manjine, obaveza poslovnog subjekta da organizuje i realizuje učenje kroz rad na jeziku te nacionalne manjine;
- i) mjesto i vrijeme realizacije učenja kroz rad;
- j) prava i obaveze učenika;
- k) nagradu učenika u skladu sa članom 48. ovog zakona;
- l) period trajanja ugovora;
- m) razlozi za prestanak važenja i raskid ugovora;
- n) način rješavanja eventualnih sporova i
- o) datum i potpisi ugovornih strana.

(2) Sastavni dio ugovora o učenju kroz rad je plan realizacije učenja kroz rad.

Član 36.

(Višestruko ugovaranje učenja kroz rad)

Učenik, odnosno roditelj ili drugi zakonski zastupnik učenika može zaključiti ugovor o učenju kroz rad sa više poslovnih subjekata sa kojima je škola zaključila ugovor o dualnom obrazovanju, ukoliko je to neophodno radi realizacije cjelokupnog sadržaja nastavnog plana i programa.

Član 37.

(Raskid ugovora o učenju kroz rad od strane poslovnog subjekta)

(1) Poslovni subjekt ima pravo raskida ugovora o učenju kroz rad ako:

- a) je ugovor o učenju kroz rad bio zaključen na osnovu lažnih podataka i dokumenata;
- b) učenik izgubi status redovnog učenika;
- c) učenik krši obaveze utvrđene ugovorom o učenju kroz rad, propisima iz oblasti srednjeg obrazovanja, ovim zakonom te internim aktima poslovnog subjekta;
- d) ako se učeniku promijenilo zdravstveno stanje, te prema mišljenju nadležne zdravstvene ustanove nije u mogućnosti nastaviti obrazovanje za obrazovni profil za koji se školuje i
- e) nastupe drugi slučajevi predviđeni propisima koji uređuju oblast obligacionih odnosa.

(2) O raskidu ugovora o učenju kroz rad poslovni subjekt će bez odlaganja obavijestiti školu i Ministarstvo.

Član 38.

(Raskid ugovora o učenju kroz rad od strane učenika, odnosno zakonskog zastupnika učenika)

(1) Učenik, odnosno zakonski zastupnik učenika ima pravo raskida ugovora o učenju kroz rad ako:

- a) učenik izgubi status redovnog učenika;
- b) ako se učeniku promijenilo zdravstveno stanje, te prema mišljenju nadležne zdravstvene ustanove nije u mogućnosti nastaviti obrazovanje za obrazovni profil za koji se školuje;
- c) poslovni subjekat ne ispunjava obaveze iz ugovora o učenju kroz rad;
- d) je doneseno rješenje o prestanku ispunjenosti uslova za izvođenje učenja kroz rad iz člana 23. stav (8) ovog zakona;
- e) poslovni subjekt izvrši povredu prava učenika propisanih ovim zakonom i drugim propisima i
- f) u drugim slučajevima predviđenim propisima koji uređuje oblast obligacionih odnosa.

(2) O raskidu ugovora o učenju kroz rad učenik ili njegov zakonski zastupnik će bez odlaganja obavijestiti školu u pisanoj formi.

Član 39.

(Posljedice raskida ugovora o učenju kroz rad)

- (1) Ako se raskida ugovor o učenju kroz rad iz razloga navedenih u članu 38. stavu (1) tač. c), d) i e) ovog zakona, škola je dužna obezbijediti izvođenje učenja kroz rad kod drugog poslovnog subjekta s kojim je zaključila ugovor o dualnom obrazovanju, ukoliko je to moguće.
- (2) U slučaju iz stava (1) ovog člana učenik, odnosno roditelj ili drugi zakonski zastupnik učenika i drugi poslovni subjekt, sa kojim je škola zaključila ugovor o dualnom obrazovanju su dužni zaključiti ugovor o učenju kroz rad.
- (3) O raskidu ugovora iz stava (1) ovog člana, odnosno o zaključenom ugovoru iz stava (2) ovog člana škola i poslovni subjekt obavještava Ministarstvo, najkasnije u roku od osam dana od dana zaključenja ugovora.
- (4) Ukoliko škola nije zaključila ugovor o dualnom obrazovanju iz stava (2) ovog člana, dužna je da u saradnji sa Ministarstvom, u roku od 15 dana obezbijedi uslove za nastavak učenja kroz rad za odgovarajuće zanimanje.

POGLAVLJE III. REGISTAR UGOVORA

Član 40.

(Registar ugovora o dualnom obrazovanju)

- (1) Registar ugovora o dualnom obrazovanju vodi Ministarstvo.
- (2) U registar iz stava (1) ovog člana upisuju se sljedeći podaci:
 - a) broj ugovora;
 - b) naziv i adresa škole;
 - c) naziv i adresa poslovnog subjekta;
 - d) broj učenika za koje poslovni subjekt organizuje učenje kroz rad;
 - e) adresa mjesta izvođenja učenja kroz rad;
 - f) datum i vrijeme zaključenja ugovora;
 - g) datum početka učenja kroz rad i
 - h) drugi podaci od značaja za evidenciju i realizaciju ugovora.
- (3) Registar iz stava (1) ovog člana vodi se u materijalnom i elektronskom obliku kao jedinstvena elektronska baza podataka.
- (4) Način vođenja registra iz stava (1) ovog člana uređuje se podzakonskim aktom Ministarstva.

Član 41.

(Upis u registar)

- (1) Poslovni subjekt je dužan da Ministarstvu dostavi primjerak ugovora o dualnom obrazovanju, u roku od osam dana od dana zaključenja ugovora, radi upisa u registar iz člana 40. stav (1) ovog zakona.
- (2) Primjerak ugovora iz stava (1) ovog člana poslovni subjekt može dostaviti Ministarstvu u štampanoj ili elektronskoj formi.

DIO ŠESTI - MENTOR

Član 42.

(Mentor)

- (1) Mentor je fizičko lice koje:
 - a) je u radnom odnosu kod poslovnog subjekta ili koje samostalno obavlja djelatnost;
 - b) ima radno iskustvo od najmanje tri godine u odgovarajućem zanimanju ili grupi zanimanja za koja se učenik obrazuje u dualnom obrazovanju;
 - c) ima najmanje isti nivo obrazovanja za odgovarajuće zanimanje za koje se učenik školuje i
 - d) koje je položilo ispit za mentora i posjeduje potvrdu o položenom ispitu za mentora (u daljem tekstu: potvrda o položenom ispitu).
- (2) Izuzetno od stava (1) tač. b) i c) ovog člana, mentor može biti i lice koje ima niži nivo obrazovanja u odnosu na nivo obrazovanja za koji se učenik školuje, ukoliko ima radno iskustvo od najmanje 10 godina u odgovarajućem zanimanju ili grupi zanimanja.

Član 43.

(Obuka i licenca za mentora)

- (1) Obuku za mentora organizuje i sprovodi Institut.
- (2) Obuka iz stava (1) ovog člana traje 40 sati.
- (3) Obuka iz stava (1) ovog člana sadrži osnove pedagoško-psihološke i metodičko-didaktičke grupe predmeta.
- (4) Nakon završene obuke iz stava (1) ovog člana, lice polaže ispit za mentora.
- (5) Institut izdaje licencu licu koje je položilo ispit za mentora.
- (6) Izuzetno, lice zaposleno kod poslovnog subjekta koje ima prijašnja iskustva u obavljanju poslova mentora u trajanju od najmanje 10 godina može bez pohađanja obuke iz stava (1) ovog člana da pristupi polaganju ispita za mentore.
- (7) Lica koja su položila ispit za mentore dužne su jednom u dvije godine pristupiti jednodnevnom usavršavanju.
- (8) Usavršavanje mentora iz stava (7) ovog člana vrši Institut.
- (9) Program obuke, bliže uslove i druga pitanja od značaja za polaganje ispita za mentora, donosi ministar.

Član 44.

(Komisija za polaganje ispita za mentora)

- (1) Institut obrazuje komisiju za polaganje ispita za mentora.
- (2) Komisija iz stava (1) ovog člana u svom sastavu ima neparan broj članova i to predstavnika poslovnih subjekata, predstavnika Ministarstva privrede, te predstavnika Instituta.

Član 45.

(Registar izdatih licenci za mentora i registar obuka za mentore)

- (1) Institut vodi registar o izdatim licencama za mentore i registar obuka za mentore.

- (2) Licenca iz člana 43. stav (5) ovog zakona i registar o izdatim licencama sadrže: registarski broj licence, ime, prezime i zanimanje lica koje je položilo ispit za mentora i naziv poslovnog subjekta kod koga je to lice u radnom odnosu, ukoliko mentor nije lice koje samostalno obavlja djelatnost.
- (3) Troškove izdavanja licence i vođenja registra o izdatim licencama i registra o obukama mentora snosi Ministarstvo iz sredstava obezbijedenih iz Budžeta Kantona Sarajevo.
- (4) Visina troškova obuke i polaganja ispita za mentora, kao i način vođenja registra iz stava (1) ovog člana utvrđuje se podzakonskim aktom kojeg donosi ministar.

DIO SEDMI – PRAĆENJE, PROVJERAVANJE, OCJENJIVANJE I ISPITI U DUALNOM OBRAZOVANJU

Član 46.

(Praćenje, provjeravanje i ocjenjivanje)

- (1) Mentor u saradnji sa koordinatorom učestvuju u procesima praćenja, provjeravanja i ocjenjivanja odgojno-obrazovnih postignuća učenika tokom učenja kroz rad.
- (2) Bliži propis kojim se reguliše praćenje, provjeravanje i ocjenjivanje odgojno-obrazovnih postignuća učenika u dualnom obrazovanju donosi ministar.

Član 47.

(Završni i maturalni ispit)

- (1) Završnim, odnosno maturalnim ispitom provjeravaju se i stečene kompetencije u skladu sa nastavnim planom i programom.
- (2) Pri provjeri kompetencija stečenih tokom učenja kroz rad obavezno učestvuje mentor odnosno u odsustvu mentora lice koje iz redova svojih radnika imenuje poslovni subjekt.
- (3) Lica iz stava (2) ovog člana u provjeri kompetencija učenika stečenih tokom učenja kroz rad učestvuju bez naknade.
- (4) Nakon položenog završnog odnosno maturalnog ispita učeniku se izdaje javna isprava, u skladu sa drugim propisima.
- (5) Dodatak diplome učenika koji je položio završni odnosno maturalni ispit sadrži podatak o obimu ostvarenog učenja kroz rad i spisak poslovnih subjekata kod kojih je učenje kroz rad obavljeno.
- (6) Bliži propis kojim se regulišu završni i maturalni ispit u dualnom obrazovanju donosi ministar.

DIO OSMI – FINANSIJSKO OBEZBJEĐENJE UČENIKA

POGLAVLJE I. NAGRADA I OSTALE NAKNADE

Član 48.

(Nagrada)

- (1) Za vrijeme izvođenja učenja kroz rad kod poslovnog subjekta, poslovni subjekt učeniku sa kojim je zaključio ugovor o učenju kroz rad isplaćuje nagradu u novcu.
- (2) Visina mjesečne neto nagrade iz stava (1) ovog člana određuje se prema ostvarenoj prosječnoj mjesečnoj neto plaći u Federaciji Bosne i Hercegovine u prethodnoj godini, i to:
 - a) u prvom razredu 10%;
 - b) u drugom razredu 15%;
 - c) u ostalim razredima 20%.
- (3) Poslovni subjekt može dodatno nagraditi učenika nagradom većom od nagrade iz stava (2) ovoga člana.
- (4) Učenik ostvaruje pravo na naknadu iz stava (2) samo za sate provedene na učenju kroz rad.

Član 49.
(Ostale naknade)

Učenik ima pravo na naknadu troškova prijevoza od škole do mjesta izvođenja učenja kroz rad i nazad u skladu sa odredbama člana 15. ovog zakona, kao i na besplatnu ishranu ili naknadu troškova za ishranu iz člana 17. stav (1) tačka g) ovog zakona.

POGLAVLJE II. REFUNDIRANJE DIJELA ILI SVIH TROŠKOVA PROCESA DUALNOG OBRAZOVANJA

Član 50.
(Obezbjedenje sredstava)

(1) Na osnovu analize ugovora iz člana 25. ovog zakona i prijava finansijska sredstva potrebna za refundiranje dijela ili svih troškova procesa dualnog obrazovanja u prethodnoj školskoj godini planira Ministarstvo privrede za svaku kalendarsku godinu.

(2) Sredstva iz stava (1) ovog člana obezbjeđuju se u Budžetu Kantona Sarajevo, na poziciji Ministarstva privrede "Podrška poslovnim subjektima u provođenju procesu dualnog obrazovanja".

(3) Visina finansijskih sredstava iz stava (2) ovog člana iznosi od 0,05% do 0,2% vrijednosti godišnjeg Budžeta Kantona Sarajevo u prethodnoj godini.

Član 51.
(Program utroška sredstava)

(1) Program utroška sredstava je dokument kojim se programira refundacija dijela ili svih troškova procesa dualnog obrazovanja poslovnim subjektima koji imaju zaključene ugovore iz člana 25. ovog zakona.

(2) Ministarstvo privrede priprema Program utroška sredstava za tekuću kalendarsku godinu.

(3) Na prijedlog Ministarstva privrede, Vlada Kantona donosi odluku o usvajanju Programa utroška sredstava.

(4) Program utroška sadrži: pregled analize zaključenih ugovora iz člana 25. ovog zakona, ukupno planirani iznos sredstava za refundaciju dijela ili svih troškova procesa dualnog obrazovanja u poslovnim subjektima, popis poslovnih subjekata koji su obuhvaćeni Programom utroška sredstava, prihvatljive troškove koji su predmet refundacije u Programu, maksimalni iznosi poticajnih sredstava po vrstama prihvatljivih troškova, uslove i kriterije u postupku izbora korisnika sredstava, isprave i drugu dokumentaciju koja se obavezno dostavlja u prijavi na javni poziv za refundaciju dijela ili svih troškova poslovnog subjekta (u daljem tekstu: javni poziv) iz člana 54. ovog zakona, obavezne elemente ugovora o realizaciji odobrenih sredstava i druge potrebne programske elemente.

(5) Ukoliko se utvrdi da je nakon obrade svih prijava po javnom pozivu iz člana 54. ovog zakona, za isplatu iznosa sredstava iz člana 50. stav (1) ovog zakona potrebno prekoračiti limit ukupno planiranog iznosa sredstava iz stava (4) ovog člana, pojedinačni iznos koji se dodjeljuje odabranom korisniku sredstava, proporcionalno se umanjuje u skladu sa ovim limitom.

Član 52.
(Prihvatljivi troškovi za refundaciju)

(1) U skladu sa ovim zakonom sredstva se mogu odobriti za refundaciju dijela ili svih troškova poslovnog subjekta, koji se troškovi odnose na:

- a) novčanu nagradu za učenje kroz rad učeniku sa kojim je zaključio ugovor o učenju kroz rad;
- b) besplatnu ishranu ili isplatu odgovarajuće naknade za troškove ishrane za učenike sa kojima je zaključio ugovor o učenju kroz rad;
- c) obezbjeđenje neophodnih sredstava za izvođenje učenja kroz rad i
- d) drugih prihvatljivih troškova definiranih Programom, koji su u funkciji provođenja procesa dualnog obrazovanja.

Član 53.

(Uslovi i kriteriji za ostvarivanje prava na sredstva)

Podnosilac prijave na javni poziv iz člana 54. ovog zakona može ostvariti pravo na sredstva po ovom zakonu:

- a) ako je registrovan i obavlja osnovnu djelatnost,
- b) ako je njegovo sjedište na području Kantona Sarajevo,
- c) ako ima izdatu potvrdu,
- d) ako ima zaključene ugovore iz člana 25. ovog zakona,
- e) ako je dokazao nastanak i plaćanje prihvatljivih troškova iz člana 52. ovog zakona u prethodnoj kalendarskoj godini,
- f) ako je obuhvaćen Programom utroška sredstava,
- g) ako je dostavio prijavu u skladu sa javnim pozivom iz člana 54. ovog zakona i
- h) ako ispunjava sve ostale uslove propisane javnim pozivom iz člana 54. ovog zakona.

Član 54.

(Javni poziv)

- (1) Ministarstvo privrede priprema i objavljuje javni poziv.
- (2) Javnim pozivom pozivaju se poslovni subjekti iz člana 3. tačka e) ovog zakona koji ispunjavaju uslove iz javnog poziva da ponesu prijave za ostvarivanje prava iz stava (1) ovog člana.
- (3) Javni poziv objavljuje se na web stranici Ministarstva privrede, a obavještenje o javnom pozivu objavljuje se u "Službenim novinama Kantona Sarajevo" i u jednom dnevnom listu čiji je izdavač pravno lice sa sjedištem u Kantonu Sarajevo.
- (4) Prijava na javni poziv mora sadržavati: uredno popunjen prijavni obrazac, projekat i drugu dokumentaciju propisanu javnim pozivom.
- (5) Prijava na javni poziv, u zatvorenoj koverti, dostavlja se Ministarstvu, direktno na protokol Kantona Sarajevo ili putem pošte.
- (6) Prijava na javni poziv koja nije dostavljena u skladu sa st. (4) i (5) ovog člana neće biti dalje razmatrana.
- (7) Rok za dostavljanje prijave je 30 dana od dana objave obavještenja iz stava (3) ovog člana u "Službenim novinama Kantona Sarajevo".
- (8) Neblagovremena prijava neće biti uzeta u razmatranje.
- (9) Prijava dostavljena po javnom pozivu ne vraća se podnosiocu prijave.
- (10) Ministarstvo privrede ne snosi nikakve troškove u pripremi i dostavi prijave na javni poziv.
- (11) Javne ustanove čiji je osnivač Kanton Sarajevo, privredna društava u vlasništvu ili većinskom vlasništvu Kantona Sarajevo, samostalne kantonalne upravne organizacije, samostalne kantonalne uprave i fond čiji je osnivač Kanton Sarajevo nemaju pravo učešća na javnom pozivu.

Član 55.

(Komisija u postupku izbora korisnika sredstava)

- (1) U periodu iz člana 54. stav (7) ovog zakona, ministar privrede Kantona Sarajevo rješenjem imenuje Komisiju u postupku izbora korisnika sredstava po javnom pozivu za refundaciju dijela ili svih troškova poslovnog subjekta (u daljnjem tekstu: Komisija u postupku izbora korisnika sredstava po javnom pozivu).
- (2) Komisija se sastoji od najmanje pet članova, uključujući i predsjednika Komisije u postupku izbora korisnika sredstava po javnom pozivu, i to: najmanje tri člana iz reda državnih službenika u Ministarstvu privrede, jednog člana iz reda državnih službenika u Ministarstvu i jednog člana iz reda stručnjaka koji nisu u radnom odnosu u kantonalnim organima državne službe, a imenovani su zbog svoje stručnosti kao vanjski saradnici iz reda akademske i/ili poslovne zajednice.

(3) Broj članova Komisije u postupku izbora korisnika sredstava po javnom pozivu, uključujući i predsjednika Komisija u postupku izbora korisnika sredstava po javnom pozivu, mora biti neparan.

(4) Komisija u postupku izbora korisnika sredstava po javnom pozivu ima imenovano lice za obavljanje administrativno – tehničkih poslova, koje ne učestvuje u odlučivanju, a imenuje se iz reda zaposlenika Ministarstva privrede.

(5) U skladu sa rješenjem iz stava (1) ovog člana, Komisija u postupku izbora korisnika sredstava po javnom pozivu je dužna sačiniti i donijeti Poslovnik o radu Komisije u postupku izbora korisnika sredstava po javnom pozivu.

(6) Poslovnik iz stava (5) ovog člana donosi se na prvom sastanku Komisije u postupku izbora korisnika sredstava po javnom pozivu, konsezzusom.

Član 56.

(Preliminarni prijedlog korisnika sredstava)

(1) Komisija u postupku izbora korisnika sredstava po javnom pozivu vrši pregled prijava, obradu i kontrolu podataka iz dokumentacije blagovremenih prijava, ocjenu o ispunjavanju uslova, primjenu pravila za izbor korisnika sredstava i limita ukupno planiranih sredstava iz člana 51. stav (4) ovog zakona.

(2) Na osnovu podataka proisteklih iz aktivnosti iz stava (1) ovog člana, Komisija u postupku izbora korisnika sredstava po javnom pozivu sačinjava preliminarni prijedlog korisnika sredstava sa iznosima ovih sredstava po svakom korisniku.

(3) Preliminarni prijedlog korisnika sredstava iz stava (2) ovog člana, Ministarstvo privrede isti dan objavljuje na svojoj web stranici i oglasnoj ploči Kantona Sarajevo.

Član 57.

(Pravna zaštita u postupku izbora korisnika sredstava)

(1) Podnosilac prijave u cilju zaštite svojih prava može dostaviti pisani prigovor Ministarstvu privrede, u roku od osam dana od dana objave preliminarnog prijedloga iz člana 56. stav (3) ovog zakona.

(2) Prigovor iz stava (1) ovog člana dostavlja se direktno na protokol Kantona Sarajevo ili putem pošte.

(3) Po prigovoru rješava Ministarstvo privrede u roku od 15 dana.

Član 58.

(Prijedlog korisnika sredstava)

(1) Nakon rješavanja blagovremenih prigovora iz člana 57. ovog zakona, Komisija u postupku izbora korisnika sredstava po javnom pozivu odmah sačinjava prijedlog korisnika sredstava sa iznosom ovih sredstava po korisniku.

(2) Prijedlog korisnika sredstava iz stava (1) ovog člana, izvještaj o radu Komisije u postupku izbora korisnika sredstava po javnom pozivu, kao i svu ostalu dokumentaciju proisteklu u radu Komisije, Komisija dostavlja Ministarstvu privrede u roku od tri dana od dana sačinjavanja ovog prijedloga korisnika sredstava.

Član 59.

(Odluka o izboru korisnika sredstava)

(1) Ministarstvo privrede, na osnovu prijedloga iz člana 58. ovog zakona, utvrđuje prijedlog odluke o izboru korisnika sredstava sa iznosom ovih sredstava po korisniku.

(2) Vlada Kantona, na prijedlog Ministarstva privrede, donosi odluku o izboru korisnika sredstava sa iznosom ovih sredstava po korisniku.

(3) Odluka iz stava (2) ovog člana objavljuje se u “Službenim novinama Kantona Sarajevo” i na web stranici Ministarstva privrede.

Član 60.

(Ugovor o realizaciji odobrenih sredstava)

(1) Nakon donošenja odluke iz člana 59. stav (2) ovog zakona, Ministarstvo privrede sa odabranim korisnicima sredstava zaključuje pojedinačne ugovore o realizaciji odobrenih sredstava (u daljnjem tekstu: ugovor).

(2) Ugovor obavezno sadrži: predmet ugovora, iznos odobrenih sredstava, namjenu dodjele odobrenih sredstava, sankcije u slučaju nepoštivanja ugovora, kao i druge neophodne elemente ugovora u cilju uspostavljanja jasnog obligacionog odnosa ugovornih strana.

Član 61.

(Informacija o realizaciji odobrenih sredstava)

(1) Na osnovu praćenja i evaluacije realizacije odobrenih sredstava, Ministarstvo privrede sačinjava informaciju o realizaciji odobrenih sredstava za odnosnu kalendarsku godinu.

(2) Informaciju iz stava (1) ovog člana, Ministarstvo privrede dostavlja Vladi Kantona Sarajevo, najkasnije do kraja tekuće kalendarske godine za proteklu godinu.

DIO DEVETI - NADZOR NAD PROVOĐENJEM ZAKONA I KAZNENE ODREDBE

Član 62.

(Nadzor nad provođenjem ovog zakona)

(1) Nadzor nad provođenjem ovog zakona vrši Ministarstvo.

(2) Inspekcijski nadzor vrši Kantonalna uprava za inspekcijske poslove.

Član 63.

(Novčane kazne za školu i odgovorno lice)

(1) Novčanom kaznom od 500,00 KM do 1.000,00 KM kaznit će se za prekršaj škola ako:

- a) o raskidu ugovora iz člana 39. stav (1) ovog zakona ne obavijesti Ministarstvo u roku iz člana 39. stav (3) ovog zakona i
- b) sa osiguravajućim društvom ne zaključi ugovor o osiguranju u ime učenika iz člana 18. stava (1) tačka c) ovog zakona.

(2) Novčanom kaznom od 250,00 KM do 500,00 KM za prekršaj iz stava (1) ovog člana kazniće se i direktor, odnosno odgovorno lice škole.

Član 64.

(Novčane kazne za poslovnog subjekta i odgovorno lice kod poslovnog subjekta)

(1) Novčanom kaznom od 500,00 KM do 1.000,00 KM kaznit će se za prekršaj poslovni subjekt ako:

- a) sprovodi učenje kroz rad suprotno članu 17. stav (2) ovog zakona,
- b) ne obezbijedi sredstava za izvođenje učenja kroz rad iz člana 17. stava (1) tačke d) ovog zakona,
- c) ne obezbijedi besplatnu ishranu ili naknadu troškova za ishranu iz člana 17. stav (1) tačka g) ovog zakona,
- d) ne pruži učenicima obuku iz oblasti zaštite na radu i ne izvrši provjeru sposobnosti učenika za sigurno obavljanje zadataka nakon obuke odnosno ne sprovede mjere zaštite na radu učenika u skladu sa važećim propisima iz oblasti zaštite na radu u skladu sa članom 17. stavom (1) tačkom e) ovog zakona,
- e) ne obezbijedi nagradu za učenje kroz rad iz člana 48. stav (2) ovog zakona i
- f) ne dostavi Ministarstvu ugovor u skladu sa članom 41. stav (1) ovog zakona i informacije iz člana 37. stav (2) i člana 39. stav (3) ovog zakona.

(2) Novčanom kaznom od 250,00 KM do 500,00 KM za prekršaj iz stava (1) ovog člana kaznit će se i odgovorno lice kod poslovnog subjekta.

DIO DESETI - PRIJELAZNE I ZAVRŠNE ODREDBE

Član 65.

(Donošenje podzakonskih akata)

- (1) Podzakonske akte za sprovođenja ovog zakona ministar donosi u roku od 12 mjeseci od dana stupanja na snagu ovog zakona.
- (2) Akte iz člana 24. stava (5) i člana 45. stava (4), te prijedlog akta iz člana 40. stava (4) ovog zakona Ministarstvo donosi u roku od najduže devet mjeseci od dana stupanja na snagu ovog zakona.
- (3) Do početka primjene ovog zakona Ministarstvo će uskladiti nastavne planove i programe sa standardima zanimanja i ishodima učenja za obrazovne profile koji će se obrazovati prema principima dualnog obrazovanja.
- (4) Do početka primjene ovog zakona Ministarstvo će realizirati pilot projekte radi provođenja ciljeva ovog zakona za zanimanja u skladu sa svojim posebnim odlukama i ugovorom o realizaciji pilot projekta zaključenim između Ministarstva, odabranih škola i poslovnih subjekata.
- (5) Pravni okvir za provođenje pilot projekta su odredbe ovog zakona.

Član 66.

(Potvrda o učenju kroz rad u stuci)

Potvrda iz člana 17. stav (1) tačka p) ovog zakona može predstavljati dokaz o radnom iskustvu prilikom zapošljavanja kod javne ustanove čiji je osnivač Kanton Sarajevo, privrednog društva u vlasništvu ili većinskom vlasništvu Kantona Sarajevo, samostalne kantonalne upravne organizacije, samostalne kantonalne uprave i fonda čiji je osnivač Kanton Sarajevo.

Član 67.

(Primjena Zakona o odgoju i obrazovanju u osnovnoj i srednjoj školi u Kantonu Sarajevo)

Na sva pitanja koja nisu regulisana ovim zakonom primjenjuju se odredbe Zakona o odgoju i obrazovanju u osnovnoj i srednjoj školi u Kantonu Sarajevo ("Službene novine Kantona Sarajevo", broj: 27/24).

Član 68.

(Stupanje na snagu)

Ovaj zakon stupa na snagu osmog dana od dana objavljivanja u "Službenim novinama Kantona Sarajevo", a primjenjuje se od školske 2025/2026. godine, za učenike koji u toj školskoj godini upisuju prvi razred srednje škole.

Broj: _____ / 2024.

Sarajevo : _____ / 2024.

Predsjedavajući

Skupštine Kantona Sarajevo